



Ilis novs veterans d'onur ed il nov veteran «CISM» cun duas damas d'onur.

FOTOS G. N. STGIER

# Midada al timun da l'uniun

Müstair: Dieta da l'Uniun dals veterans da musica dal Grischun

DA GION NUTEGN STGIER / ANR

■ **Josef Schaniel è da nov president da l'uniun cun bunamain 1400 commembers. Il Surmiran succeda ad Erich Zanoli, il qual è sa retratg suenter 24 onns gronda activitad per l'uniun. En moda perfetga e cordiala ha la Musica Concordia Müstair organisà la dieta. En in onn ha quella lieu a Trun.** La Val Müstair ha purschi tetg a bunamain 500 veterans da musica da noss chantun e suenter ils dus dis empernivals en musicantas e musicants turnads a chasa cun regurdientschas plaschaivlas. Ils «Jauers» en stads ospitants gentils ed han purschi in program cultural zunt varià als veterans ch'èn vegnids en rotschas, malgrà il via-di lung. Bliers da quels en natiralmam er vegnids per far onur al president partent *Erich Zanoli*, l'um oriund da Müstair e sesent a Cuira. Bunamain in terz da sia vita è el s'engaschè exemplaric per l'Uniun dals veterans da musica dal Grischun, quella uniun ch'el ha surdà dumengia passada en novs mauns cun betg pli esser uschè saun e frestg. *Erich Zanoli* è stà 15 onns in president fitg activ e 9 onns in cassier fidà e vardaivel da l'uniun, quella associaziun che unescha dapi il 1976 ils veterans da musica da noss chantun. Il lung applaus suenter ses davos pled sco president conferma ch'el è stà in um che ha davaira vivì per l'uniun ed in

president apprezzà da l'entira «famiglia» dals veterans da musica.

### Solidarità ed amicizia

*Dumeng Fallet*, il president da la Musica Concordia Müstair, è sa mussà ventirivel da la solidarità ed amicizia dals veterans envers ils organisaturs da la 38avla dieta da l'Uniun dals veterans da musica dal Grischun. Il 1989 haja la musica gi l'onur d'organisar l'inscunter dals veterans da musica ed ussa 24 onns pli tard danovamain e quai saja zunt plaschaivel. La Musica Concordia Müstair ha lura er dà a la dieta il vestgì musical e confermà che la musica viva er en la Val Müstair. Drizzà intgins plects cordials a la societad ha er *Arno Lamprecht*, il president da la vischnanca Müstair. *Robert Casanova*, il president da l'Uniun chantunala da musica dal Grischun, ha ditg als preschents che per la cultura saja la musica indispensabla. *Ueli Nussbaumer*, il commember da l'uniun tetgala naziunala da musicantas e musicants, ha ditg ch'ils veterans sajan il meglier fundament da las societads da musica. «Vus avais gronda experientscha e vus enconuschais bain la collegialità e mes giavisch è che vus dajas vinvant quella, saja quai a veterans ubain a la generaziun giuvna», ha ditg il giast da la Bassa. *Hans Peter Michel*, il president dal cussegl grond, ha ditg ch'el saja vegnì gugent a Müstair er per mussar a tuts ch'il Grischun fineschia betg a Cuira. Il pli aut Grischun ha cunzunt er drizzà

pleds d'engraziament als veterans per lur prestaziuns instancablas en quels bliers onns sco musicants.

### 20 novs veterans d'onur

Senza cuntercandidats han lura ils preschents elegì *Josef Schaniel* sco nov president e successor dad *Erich Zanoli*. L'um ch'è da nov al timun da l'Uniun dals veterans da musica dal Grischun vegn a la fin da quest mais 70 onns, el è oriund da Tinizong e dapi 45 onns sesent a Cuira. *Josef Schaniel* è veteran d'onur ed è da preschent anc musicant activ da la Musica da la citad Cuira. El ha engrazià als veterans per lur fidanza e per la tscherna onuravla. En in mument da silenzi han lura ils veterans er preni cumià da lur 22 amis ch'èn morts dapi la dieta dal 2012 a Vaz sut. In da quels è er *Joachim Caluori*, l'antierur cusseglier guvernativ e padrin da la bandiera da l'uniun. In mument pli legraivel è lura stà cura ch'ils 20 novs veterans d'onur en vegnids undrads. Tranter quels sa chattan er intgins da societads da musica da l'intschess rumantsch. Els en tuts 50 onns commembers activs dad ina furmaziun da musica. Undrà per 60 onns musicant activ è vegnì *Leonhard Schmellentin* da Samedan che suna cun la Societad da musica Chinuos-chel/Brail. En in onn segna la Societad da musica Trun per l'organisasiun da la dieta, quai en connex cun il giubileum da 150 onns da la societad.



Josef Schaniel (dretg), il nov president da l'Uniun dals veterans da musica dal Grischun cun Gion Darms, il president dals veterans da chant da noss chantun.



Onur als veterans ha er fatg *Hans Peter Michel* (dretg), il president dal cussegl grond. Qua cun *Robert Casanova*, il president da l'Uniun chantunala da musica da noss chantun.



Organisà stupent la dieta ha la Musica Concordia Müstair: *Valentin Pitsch*, president dal comité d'organisasiun, *Dumeng Fallet*, president da la musica e *Georg Fallet*, deputà (da san.).



Flurs dad *Armin Alig* per *Annina Zanoli*, la dunna dal president partent.



Trais veterans da la Societad da musica Breil: *Ludwig Maissen*, *Sep Cathomas* e *Venanzi Seiler* (da san.).



Veterans d'onur e veterans da la Musica instrumentala Savognin: *Gregor Spinas*, *Riccardo Savoldelli*, *Masch Pool*, *Claude Pittet* e *Cyrrill Brenn* (da san.).